



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

8. Kalenderwoche – ab 21. Februar 2010

Glassngambf is ieborflissisch

Es dud Leide gähm, die sachn, dasses nu gahr keen Glassngambf gähm dud. Un es dud desvorwähschn keen mähr gähm, weilor nisch mähr nedisch is. Weil ehm sobiso alles so is wies is! Weil de sobiso nischd dagähnschn machn kannsd, selbsd wennsde was machn wölldesd! Un de meisdn wissn ooch gahr nisch, wasse machn dun kenndn, wennse se wölldn.

Nascha, es is ja eischendlich ooch alles ganz gud ingerischded - keenor muss vorhungorn odor vordurschn - bei uns hier!

Was draußen in dor Weld bassiern dud, das dud ja sobiso keen mähr als wie nedisch indressiern. Was kannsde ooch schon machn, wenn da off Haiddi e Ährdbähm is? Da kannsde nischd machn. Guhd, villschd e bißl Geld schbendn... abor sonsd?

Dass dord off Haiddi schon seid viele Jahre alles sähr finsdor aussähn dud, weil dord e Reschiehm von Amis Gnadn regiern dud... genau wie nähman in dor Domenniganischn Rebublig... nee, das dud keen offreeschn! Da fahrn bloß viele in Urlaub hin un dun dann dord hinnor Stachldrahdzäune sisch dähn Bauch braun brenn lassn. Dass da ringsrum um das abgerieschldde Hodel alles sähr finsdor is... - das dud nisch indressiern.

Offrähnschn dun sisch de frein Medien un de frein Bollediggorn immor bloß ab un zu ma iebor Guba, wo dor Fidel de Machd had un wos fasd alln Leidn einischormaßn guhd gehn dud. Abor das darf ja ehm nisch sein. E gommunisdisches Derrorreschiem bleibd ooch ohne Derror e Derrorreschiehm. Dord wo Derror is, abor de Amis de Hand drieborhaldn dun, da is kee Derror, dord dud sisch bloß de Freiheit auslähm!

Das is so. Das is ooch in de ledzdn Jahrzähnde immor so gewähns. De Amis leeschn fesd, wo Derror is un was Derror is. Un dann dunse dord de Freiheit hinbring, wo se denkn dun, dasses nedisch is. Nedisch isses ja zum Beischbiel im Irag gewähns! Odor ooch in Afghanisdahn!

Na, de Freiheit in Afghanisdahn had dähn Amis immorhin schdeischende Befriedischung dor Nachfrage nach Rauschgifd eingebrachd. Bevor de Amis dord de Freiheit eingefiehrd haddn, is ja fasd de gesamd Unnorweld von Nuh Jorg an Heroinmangl eingegang! Nee, in Afghanisdahn mussde schnellsdens de Freiheit hähr! Wie im Irag. Un die muss nu ooch beschidzd wern!

Nee, Glassngambf is werglisch iborflissisch gewordn. Das Gabidahl is middlorweise so schdarg... - na, un wens ma een leischdn Schwäscheanfall ham dud... dann hads ja noch dähn Schdaad, dähr de Schdeurzahlor schröbfn dud, damid das Gabidahl nisch nodleidn muss.

Nee, warum soll das Gabidahl geeschn die gämbfn, die nisch Gabidahl sinn? Das Gabidahl had keen Grund mähr zum Gämbfn. Es haldn doch alle brav schdille!

Eduard Sachsenmeyer